



O humor “do país” volve aos escenarios da Coruña este domingo cos monólogos R

- *Da man dos/as monologistas máis coñecidos/as de Galicia regresan coas mesmas ganas e vigor de hai 15 anos os monólogos R, evento mítico do operador galego.*
- *Touriñán, Celso Sanmartín e Lucía Veiga pisarán este domingo 19 as táboas de Palexco para ofrecer a un público fiel os seus monólogos nun espectáculo exclusivo para escachar coa risa.*
- *R leva dende 2008 apostando polo humor “do país” e a fórmula dos monólogos para achegarse, de xeito diferente, aos seus clientes/as e á poboación de Galicia en xeral.*

Xoves, 16 de marzo de 2023.- Este domingo 19 de marzo retómase unha das accións máis emblemáticas de R, o exitoso periplo dos **monólogos R** que dende hai xa quince anos vén facendo rir a miles de galegos e galegas da man dos actores e actrices máis populares da terra.

A cita, no Pazo de Exposicións e Congresos da Coruña (Palexco), desdobrarase en dúas convocatorias: a primeira, ás 17:00 h e a segunda ás 20:30 h. A capacidade é limitada e para acudir cómpre contar con algunha das invitacións de R para clientes/as ou coas conseguidas nos concursos de redes sociais. En ambas as dúas sesións, Xosé A. Touriñán (‘Touri’), Lucía Veiga e Celso Sanmartín subirán ao escenario para contar as súas historias hilarantes a un auditorio sempre predisposto á risa e entregado aos/ás artistas dende o minuto cero.

Comeza así outra etapa deste evento, querido e demandado como ningún por un público incondicional. Os monólogos R son unha aposta polo humor “do país” en estado puro, un espectáculo divertidísimo que conducen dende sempre monologistas da canteira galega moi populares en Galicia quen, seguro, tamén este ano provocarán as gargalladas do seu público.

O percorrido dos monólogos R continuará o domingo 26 no Auditorio ‘Mar de Vigo’ da cidade olívica onde Carlos Blanco, Pepo Suevos e, de novo, Lucía Veiga, protagonizarán outra noite de risas nunha sesión única a partir das 20:00 h.

“Dismo ou cóntasmo?”

Na vida hai monólogos por todas partes e, ás veces, cando a historia é moi interesante ou xera incredulidade, soltámoslle a quen a narra, con certa retranca: “dismo ou cóntasmo?”. Este é o punto de partida do novo espectáculo dos **monólogos R**, que ofrecerá contido exclusivo narrado por esta tríade autóctona de monologistas o domingo en Palexco.

Xosé A. Touriñán será o mestre de cerimonia e á vez dará boa conta das súas ocorrencias en varias intervencións particulares. O cómico irá establecendo tamén conversas coa súa compañeira e compañeiro de escenario, Lucía Veiga e Celso Sanmartín, que tamén ofrecerán os seus propios monólogos.



43.700 asistentes, 30 localidades e monologistas da terra

Dende os seus inicios, os **monólogos R** organizáronse pensando especialmente nos/nas clientes/as do operador galego, a través dun formato definido (relato dunha única persoa en voz alta) que **R** escolle dende 2008 para manterse preto da súa xente.

É tamén unha aposta polo talento do país, polo enxeño e polo humor, talvez este último un dos xeitos máis rápidos e eficaces de acurtar distancias entre as persoas. De feito, son xa case 15 anos que falan de éxitos totais nas convocatorias destes espectáculos nos que hai garantidas risas a esgalla.

E, como mostra, as cifras: ata a data, en formato presencial, alcanzouse a cantidade de **43.700 asistentes aos monólogos R**, con espectáculos non só nas sete principais cidades galegas (A Coruña, Lugo, Ourense, Pontevedra, Santiago de Compostela, Vigo e Ferrol), senón tamén noutras moitas localidades da comunidade como Viveiro, Vilalba, Ordes, Xinzo da Limia, Sarria, O Carballiño, Carballo, Ribadeo, Verín, Lalín, A Estrada, Melide, Noia, Allariz, As Pontes de García Rodríguez, O Barco de Valdeorras, Ponteceso (O Couto), Porriño, Cee ou Boiro, ata chegar a unha **trintena de concellos visitados**.

A respecto do **talento galego**, polos **monólogos R** pasaron humoristas e monologistas do territorio tan populares como David Amor, Isi, Rober Bodegas, Marcos Pereiro, Federico Pérez, Javier Veiga, Víctor Grande, David Perdomo, Marita Martínez, Oswaldo Digón ou, xa nesta edición de 2023, Celso Sanmartín, Lucía Veiga, Carlos Blanco, Pepo Suevos e Xosé A. Touriñán; os tres últimos xa asiduos desta cita tan hilarante de **R** co público galego.

Sobre os/as monologistas

Xosé A. Touriñán, popularmente coñecido como 'Touri', comezou a despuntar como actor e humorista nas "Cantareiras de Ardebullo", xunto a Marcos Pereiro. Vímolos no cine e no teatro interpretando o papel de fillo do narco Manuel Charlín en "Fariña" ou dándolle vida a unha infinidade de personaxes na gran pantalla, percorrendo "Rutas bizarras" en La2 e moitas veces subido aos escenarios cos seus monólogos e espectáculos teatrais.

Lucía Veiga é monologista, actriz e presentadora de televisión. A súa cara é moi coñecida para os espectadores dos programas "Malo será", "Luar" ou "Malicia noticias" na TVG e polos seus espectáculos de improvisación con Izquierdo Sisters, como "Galician Horror History". Como actriz, despuntou con éxito na serie "Rapa", por cuxo papel vén de conseguir o premio Mestre Mateo á mellor interpretación feminina.

Celso Sanmartín é poeta e narrador oral. Considerado un dos contadores de historias máis recoñecidos do panorama actual, en 2022 recibiu o premio 'Rebulir da Cultura Galega' na categoría de artes escénicas por preservar e difundir a tradición oral galega e levar os contos do rural aos escenarios.

comunicación R
prensa@mundo-r.net
R.gal